

Il SuperDizionari de lenghe furlane al è online


Su www.arlef.it, la plateforme digjitâl plui potente su la lenghe furlane: intun imprest sôl il Dizionari bilengâl Talian-Furlan, il Dizionari Monolengâl e il Dizionari dai Cognons

Al è rivât il SuperDizionari de lenghe furlane, la agnove plateforme digjitâl realizade de ARLeF che e da dongje tal sît www.arlef.it i principâi dizionaris de lenghe furlane. Un imprest gratuit, avanzât e acessibil, pensât par valorizâ e slargjâ l'ûs dal furlan. Un projet in atuazion dal Plan gjenerâl di politiche linguistiche pal furlan de Region Autonome F-VJ.

Il gnûf imprest al è stât presentât intune conference stampe li che a son intervignûts l'assessôr regionâl aes Autonomiis locâls, Pierpaolo Roberti; il president de ARLeF, Eros Cisilino e il diretôr William Cisilino; Giulio Pecorella di Ensoul, la agenzie di web development che e à disvilupât il projet.

Midiant di une interface uniche e intuitive, il SuperDizionari al ufris un acès facil ai contignûts di trê risorsis digjitâls preziosis: il Grant Dizionari Bilengâl Talian-Furlan; il Dizionari de Lenghe Furlane e il Dizionari dai Cognons. Chest ultin al è une vere enciclopedie dai cognons dal Friûl cun nons, riferiments storics, informazions e curiositâts.

«Il plan gjenerâl di politiche linguistiche al à tra i siei elements di fonde i zovins, i media e lis gnovis tecnologjiis. Il gnûf projet de ARLeF ju met ducj e trê adun in grazie di un imprest che al è stât studiât ancje par garantî un inzornament costant tal timp. La atenzion al evolvisi de tecnologjie e ae velocitât di chest procès



Il SuperDizionari de lenghe furlane

a son aspiets che no si pues no tignî cont cuant che o fevelin di difese des lenghis minoritariis.», al à declarât l'assessôr **Pierpaolo Roberti**.

«Potenziâ lis tecnologjiis al è une passaç fondamentâl ancje pe lenghe furlane come par altris lenghis di minorance de Europe. Il SuperDizionari al è il risultât di un lavôr complès, che nus coneterà cuntun ambient ilimitât», al à ricuardât **Eros Cisilino**, president de ARLeF.

«Cul SuperDizionari, la nestre comunitât e fâs un pas indenant fondamentâl bande l'avignî. Students, insegnants, ricercjadôrs, tradutôrs, citadins comuns e apassionâts de lenghe a podaran cjatâ intun unic portâl lis risorsis lessicografichis principâls sul furlan», al à zontât il diretôr de Agenzie, **William Cisilino**.

«Al è "Super" parcè che al è stât pensât cun criteris par facilitâ la leture, la consultazion e l'ûs. Un imprest avanzât, eficaç e facil di consultâ», al à precisât **Giulio Pecorella** di Ensoul.

Par fâ cognossi al public il SuperDizionari, la ARLeF e à metût in vore ancje une campagne di informazion articolade sui social, sul web e par radio, dal titul "Se no ti ven sù la peraule juste... cirile tal puest just!".

Intelligence artificiâl al servizi de lenghe furlane

La Region F-VJ e la ARLeF a àn celebrât ai 26 di Setembar la Zornade Europeane des Lenghis, cu la cunvigne "Lenghis e intelligence artificiâl - Gnovis oportunitâts di cressite e di disvilup". La iniziative e je stade metude in vore in colaborazion cun INSIEL, CNR - Consei Nazionâl des Ricercjis, Beliven, Bip Group (partner di Google Italie), Ditedi, Ensoul, Evoseed, Infofactory e The Vortex; la cunvigne e à presentât une panoramiche sul rûl strategjic des tecnologjiis linguistichis.

«Invistî te intelligence artificiâl aplicade al furlan al vûl dî puartâ la nestre lenghe tal digjitâl, valorizâ il patrimoni culturâl e infuartî la coesion sociâl dal teritori» al à ricuardât l'assessôr regionâl ai sistemis informatîfs, **Sebastiano Callari**.

«Il projet dal tradutôr talian-furlan, disvilupât di Insiel, in colaborazion cu la ARLeF, al mostre che la inovazion e pues jessi ancje al servizi de valorizazion linguistiche», al à zontât **Doriano Maranzana**, diretôr dal supuart al client di Insiel Spa.